

四庫全書

集部

欽定四庫全書

御定全唐詩卷四百六十八

劉言史

劉言史邯鄲人與李賀同時歌詩美麗恢贍自賀外世
莫能比亦與孟郊友善初客鎮冀王武俊奏為棗強令
辭疾不受人因稱為劉棗強後客漢南李夷簡署司空
掾尋卒歌詩六卷今編一卷

苦婦詞

地遠易驕崇用刑匪精研哀哉苦婦身夫死百殃纏草

草催出門衣墮髮披肩獨隨軍吏行當夕余一作途欲遷

還一作來時已厭生一作坐到此自不全臨江卧黃沙二子

死在邊氣噦不發聲背頭血涓涓有時強為言祇是尤

青天藁薦無一枝冷氣兩懸懸窮荒夷教卑骨肉病棄

捐況非本族音一作姻肌露誰為憐事痛感行實住得貪

程船必當負嚴法豈有胎孕篇遊畋復釋麟羔兔尚免

鷗何處擯逐深一罪三見顛校尉勲望重一作崇幕府才

且賢蘭裙間珠履食玉處花筵但勿輕所暗莫慮無人
焉

與孟郊洛北野泉上煎茶

粉細越笋芽野煎寒溪濱恐乖靈草性觸事皆手親敲
石取鮮火撒泉避腥鱗熒熒爨風鐺拾得墜巢薪潔色
既爽別浮盃亦慙慙以茲委曲靜求得正味真宛如摘
山時自散指下春湘瓷泛輕花滌盡昏渴神此遊愜醒
趣可以話高人

七夕歌

星寥寥兮月細輪佳期可想兮不可親雲衣香薄粧態
新彩輶悠悠渡天津玉幌相逢夜將極妖紅慘黛生愁
色寂寞低容入舊機歌著金梭思往夕人間不見因誰
知萬家閨艷求此時碧空露重彩盤濕花上乞得蜘蛛
絲

立秋日

商風動葉初蕭索一貧居老性容茶少羸肌與簞疎舊

醅難重漉新菜未勝鉏才薄無潘興便便畫一作書偃廬

題茅山仙臺藥院

擾擾浮生外華陽一洞春道書金字小仙圃玉苗新芝
草迎飛燕桃花笑俗人樓臺爭聳漢鷄犬亦嫌秦願得
青芽散長年駐此身

送婆羅門歸本國

剎利王孫字迦攝竹錐橫寫叱蘿葉遙知漢地未有經
手牽白馬遶天行龜磧西胡雪黑大師凍死來不得

地盡年深始到船海裏更行三十國行多耳斷金環落
冉冉悠悠不停脚馬死經留却去時往來應盡一生期
出漢一作漢獨行人絕處磧西天漏雨絲絲

瀟湘遊

夷女采山蕉緝紗浸江水野花滿髻妝色新閒歌款乃
深峽裏款乃知從何處生當時泣舜腸斷聲翠華寂寞
嬋娟沒野篠空餘紅淚情青煙冥冥覆杉桂崖壁凌天
風雨細昔人幽恨此地遺綠芳紅艷含怨姿清猿未盡

鼯鼠切淚水流到湘妃祠北人莫作瀟湘遊九疑雲入
蒼梧愁

放螢怨

放螢去不須留聚時年少今白頭架中科斗萬餘卷一
字千回重照見青雲杳渺不可親開囊欲放增餘怨且
逍遙還酩酊仲舒漫不窺園井那將寂寞老病身更就
微蟲借光影欲放時淚沾裳衝籬落千點光

一作去衝
籬落千點

觀繩伎

潞府李相公席上作

泰陵遺樂何最珍，綵繩冉冉天仙人。
廣場寒食風日好，百夫伐鼓錦臂新。
銀畫青綃抹雲髮，高處綺羅香更切。
重肩接立三四層，著屐背行仍應節。
兩邊一作圓九

釵漸

相迎側身交步何輕盈，閃然欲落却收得。
萬人肉上寒毛生，危機險勢無不有。
倒挂纖鬚學垂柳，下來一一芙蓉姿。
粉薄鈿稀態轉奇，坐中還有沾巾者。
曾見先皇初教時。

買一作賣花謠

杜陵村人不田穡入谷經谿復緣壁每至南山草木春

即向侯家取金碧幽艷凝華春景曙林一作村夫一作采來移

得將何處蝶惜芳叢送下山尋斷孤香始回去夢少居

連鳩鵲東千金使買一株紅院多花少栽未得零落綠

娥纖指中咸陽親戚長安里無限將金買花子澆紅溼

綠千萬家青絲玉轡聲啞啞

王中丞宅夜觀舞胡騰

王中丞武俊也

石國胡兒人見少蹲舞尊前急如鳥織成蕃帽虛頂尖
細氎胡衫雙袖小手中拋下蒲萄盞西顧忽思鄉路遠
跳身轉轂實帶鳴珰脚續紛錦靴軟四坐無言皆瞪目
橫笛琵琶徧頭促亂騰新毯雪朱毛傍拂輕花下紅燭
酒闌舞罷絲管絕木槿花西見殘月

竹裏梅

竹裏一作興梅花相竝枝梅花正發竹枝垂風吹總向竹

枝上直似王家雪下時

春過趙墟

下馬邯鄲陌頭歇寂寥
崩隧臨車轍古栢重生枝亦乾
餘燎一作漆見風幽燄滅
白蒿微發紫槿新行人感此復
悲春

初下東周贈孟郊

鶴老身

一作耳

更印

一作工

龜死殼亦靈正信

一作性

非外公

終始全本情童子不戲塵
積書就巖扃身著木葉衣
養鹿兼犂耕偶隨下山雲
荏苒失故程漸入機險中
危思

難太行十髮九縷絲悠然東周城言詞野麋態出口多
累形因依漢元寮未似羈細輕冷竈助新熟靜砧與寒
聲斷蓬在門欄豈當桃李榮寄食若蠹蟲侵損利微生
固非拙為強懦劣外一作寂療并素堅冰蘖心潔持保堅
貞修文返正風刊字齊古經慙將衰末分高棲喧世名
過春秋峽

峭壁蒼蒼苔色新無風晴景自勝春不知何樹一作事幽

崖裏臘月開花似北人

長門怨

獨坐爐邊結夜愁暫時思

一作思

去亦難留

一作收

手持金

筇垂紅淚亂撥寒灰不舉頭

春遊曲

一作樂府

花領紅駿

一作顏鬢髮

一何

一作向

偏綠槐香陌欲朝天仍嫌

衆裏嬌行疾傍鞚深藏白玉鞭

噴沫

一作珠噴

團香小桂條玉鞭魚賜霍嫖姚弄影便從天

禁出碧蹄聲碎五門橋

廣州王園寺伏日即事寄北中親友

南越初逢伏東林度一朝曲池煎畏景高閣絕微飈竹
簾移先灑蒲葵破復搖地偏毛瘴近山毒火威饒裛汗
絺如濯親牀枕竝燒墮枝傷翠羽萎葉惜紅蕉且困流
金熾難成獨酌謠望霖窺潤礎思吹候生一作鳴條旅恨
生烏澣鄉心繫洛橋誰憐在炎客一夕壯容銷

立秋

茲晨戒流火商飈早已驚雲天收夏色木葉動秋聲

別落花

風艷霏霏去羈人處處游明年縱相見不在此枝頭

登甘露臺

偶至無塵空翠間雨花甘露境閑閑身心未寂終為累
非想天中獨退還

夜泊潤州江口

秋江欲起白頭波賈客占風無渡河千船火絕寒宵半
獨聽鐘聲覺寺多

看山木瓜花二首

裊露凝氛紫艷新
千般婉娜不勝春
年年此樹花開日
出盡丹陽郭裏人

柔枝濕艷亞朱欄
暫作庭芳便欲殘
深藏數片將歸去
紅縷金針繡取看

題十三弟竹園

繞屋扶疎聳翠莖
苔滋粉漾有幽情
丹陽萬戶春光靜
獨自君家秋雨聲

樂府雜詞三首

紫禁梨花飛雪毛春風絲管翠樓高城裏萬家聞不見
君王試舞鄭櫻桃

蟬鬢紅冠粉黛輕雲和新教羽衣成月光如雪金堦上
迸却頗梨義甲聲

不耐簷前紅槿枝薄妝春寢覺仍遲夢中無限風流事
夫壻多情亦未知

歲暮題楊錄事江亭

揚生蜀客

垂絲蜀客涕濡衣歲盡長沙未得歸腸斷錦帆風日好
可憐桐鳥出花飛

冬日峽中旅泊

霜月明明雪復殘孤舟夜泊使君灘一聲鐘出遠山裏
暗想雪窗僧起寒

泊花石浦

舊業叢臺廢苑東幾年為梗復為蓬杜鵑啼斷回家夢
半在邯鄲驛樹中

聞崔倚旅葬

遠客那能返故廬
蒼梧埋骨痛何如
他時親戚空相憶
席上同悲一紙書

賦蕃子牧馬

磧淨山高見極邊
孤烽引上一條煙
蕃落多晴塵擾擾
天軍獵到鷁鷁泉

牧馬泉

平沙漫漫馬悠悠
弓箭閒拋郊水頭
鼠毛衣裏取羌笛

吹向秋天睂眼愁

越井臺望

獨立陽臺望廣州更添羈客異鄉愁晚潮未至早潮落

井邑暫依沙上頭

扶病春亭

強梳稀髮著綸巾捨杖空行試病身花間自欲裴回立
裊子牽衣不許人

贈童尼

舊時艷質如明玉今日空心是冷灰料得襄王惆悵極
更無雲雨到陽臺

讀故友于君集

大底從頭總是悲就中偏愴築城詞依然想得初成日
寄出秋山與我時

病僧二首

竺國鄉程算不回病中衣錫徧浮埃如今漢地諸經本
自過流沙遠背來

空林衰病卧多時
白髮從成數寸絲
西行却過流沙日
枕上寥寥心獨知

右軍墨池

永嘉人事盡歸空
逸少遺居蔓草中
至今池水涵餘墨
猶共諸泉色不同

送僧歸山

楚俗翻一作蕃花自送迎
密人來往豈知情
夜行獨自寒

山寺雪徑泠泠金錫聲

題源分竹亭

繞屋扶疎千萬竿

一作人

相誘獨行看日光不透煙

常在先校諸家一月寒

山寺看櫻桃花題僧壁

楚寺春風臘盡時
含桃先坼一千枝
老僧不語傍邊坐
花發人來總不知

傷清江上人

往年偏共仰師遊
聞過流沙淚不休
此身豈得多時住

更著塵心起外愁

山寺看海榴花

琉璃地上紺宮前
發翠凝紅已一作幾

十年夜久月明人

去盡火光霞燄遞相燃

贈成鍊師四首

花冠藥帔色嬋娟
一曲清簫凌紫煙
不知今日重來意
更住人間幾百年

黃昏騎得下天龍
巡遍茅山數十峰
採芝却到蓬萊上

花裏猶殘碧玉鐘

等閒何處得靈方
丹臉雲鬟日月長大羅過却三千歲
更向人間魅阮郎

曾隨阿母漢宮齋
鳳駕龍輶列玉一作御塔當時白燕無

尋處今日雲鬟見玉釵

上巳日陪襄陽李尚書宴光風亭

碧池萍嫩柳垂波
綺席絲鋪舞翠娥
為報會稽亭上客
永和應不勝元和

奉酬

閨餘春早景沈沈
襖飲風亭恣賞心
紅袖青娥留永夕
漢陰寧肯羨山陰

病中客散復

一作後

言懷

華髮離披卧滿頭
暗蟲衰草入鄉愁
枕前人去空庭暮
又見芭蕉白露秋

處州月夜穆中丞席和主人

羌竹繁弦銀燭紅
月光初出柳城東
忽見隱侯裁一詠

還須書向郡樓中

尋花

遊春未足春將度
訪紫尋紅少在家
借問流鶯與飛蝶
更知何處有幽花

贈陳長史妓

本內
官人

寶鈿雲和玉禁僊
深含媚靨裏朱絃
春風不怕君王恨
引出幽花落外邊

題王況故居

入巷蕭條起悲緒兒女猶居舊貧處塵滿空牀屋見天
獨作驢鳴一聲去

偶題

遲日新妝遊冶娘盈盈綵艇白蓮塘掬水遠濕岬邊郎
紅綃縷中玉釧光

慟柳論

孀妻棲戶仍無嗣欲訪孤墳誰引至裴回無處展哀情
惟有衣襟知下淚

夜入簡子古城

遠火熒熒聚寒鬼
綠燄欲銷還復起
夜深風雪古城空
行客衣巾汗如水

桂江中題香頂臺

岩岩香積凌空翠
天上名花落幽地
老僧相對竟無言
山鳥却呼諸佛字

僧簷前獨竹詠

亂石田中寄孤本
亭亭不住凌虛引
欲以袈裟拂著來

一邊碧玉無輕粉

送人隨姊夫任雲安令

閒逐維私向武城北風青雀片時行孤帆瞥過荊州岾
認得瞿塘急浪聲

山中喜崔補闕見尋

鹿袖青藜鼠耳巾潛夫豈解拜朝臣白屋藜牀還共入
山妻老大不羞人

偶題二首

金榜榮名俱失盡
病身為庶更投魑
春娥慢笑無愁色
別向人家舞柘枝

得罪除名謫海頭
驚心無暇與身愁
中使不知何處住
家書莫寄向春州

嘉興社日

消渴天涯寄病身
臨邛知我是何人
今年社日分餘肉
不值陳平又不均

席上贈李尹

偃僂山夫髮似絲松間石上坐多時瓢飲不曾看酒肆
世人空笑亦何為

弼公院問病

一頭細髮兩分絲卧見芭蕉白露滋欲令居士身無病
直待衆生苦盡時

惜花

年少共憐含露色老人偏惜委塵紅如何遂得心中事
每要花時不厭風

代胡僧留別

此地緣疎語未通
歸時老病去無窮
定知不徹南天竺
死在條支陰磧中

桂江逢王使君旅櫬歸

故人丹旆出南威
少婦隨喪哭漸歸
遙想北原新壠上
日寒光淺水松稀

玉京詞

絕景寥寥日更遲
人間甲子不同時
未知樵客終何得

歸後無家是看棋

葛巾歌

貝州漳南縣
贈楊炯

一片白葛巾潛夫自能結
籬邊折枯蒿聊用簪
華髮有時醉倒長松側
酒醒不見心還憶
谷鳥銜將却趁來野
風吹去還尋得十年
紫竹溪南住跡同
玄豹依深霧草堂
窗底漉春醅
山寺門前逢暮雨
臨汝袁郎得相見
閒雲引到東陽縣
魯性將他類此身
還拈野物贈傍人
空留梳杖犢鼻褌
濛濛煙雨歸山村

北原情三首

錯莫天色愁挽歌出重圍誰家白網車送客入幽塵銘
旌下官道葬輿去麟麟蕭條黃蒿中奠酒花翠新米雪
晚霏微墓成悄無人烏鳶下空地煙火殘荒榛生人更
多苦入戶事盈身營營日易深却到不得頻寂寥孤隧
頭草綠棠梨春

洛陽城北山古今塋冥客聚骨朽成泥此山土多白近
來送葬人亦去聞歸聲豈能車輪疾漸是墓侵城城中

人不絕哀挽相次行莫非北邙後重向洛城生

卜地起孤墳全家送葬去歸來却到時不復重知處疊
疊葬相續土乾草已綠列紙瀉壺漿空向春雲哭

林中獨醒

晚來林沼靜獨坐間瓢尊向已非前跡齊心欲不言微
涼生亂篠輕馥起孤萱未得渾無事瓜田草正繁

江陵客舍留別樊尚書

信陵門館下多病有歸思墜履忘情後寒灰更濕時委

欄芳蕙晚憑几雪髻垂明日秋關外單車風雨隨

御定全唐詩卷四百六十八

欽定四庫全書

御定全唐詩卷四百六十九

長孫佐輔

長孫佐輔德宗時人其弟公輔為吉州刺史往依焉其
詩號古調集今存十七首

擬古詠河邊枯樹

野火

一作人

燒枝水洗根數圍孤樹

一作枯朽

半心存應是無

機承雨露却將春色寄苔痕

別友人

愁多不忍醒時別
想極還尋靜處行
誰遣同衾又分手
不如行路本無情

傷故人歌妓

愁臉無紅衣滿塵
萬家門戶不容身
曾將一笑君前去
誤殺幾多回顧人

南中客舍對雨送故人歸北

猿聲啾啾雁聲苦
卷簾相對愁不語
幾年客吳君在楚

況送君歸我猶阻家書作得不忍封北風吹斷階前雨

杭州秋日別故友

相見又相別大江秋水深悲歡一世事去住兩鄉心
淅瀝籬下葉淒清階上琴獨隨孤櫂去何處更同衾

代別後夢別

別中還夢別悲後更生悲覺夢俱千里追隨難再期
翻思夢裏苦却恨覺來遲縱是非真事何妨夢會時

答邊信

一作代答邊信同心結

征人去年戍遼水夜得邊書字盈紙揮刀就燭裁紅綺
結作同心答千里君寄邊書書莫絕妄答同心心自結
同心再解心不離書字頻看字愁減結成一夜和淚封
貯書只在懷袖中莫如書字故難久願學同心長可同

對鏡吟

憶昔逢君新納娉青銅鑄出千年鏡意憐光彩固無瑕
義比恩情永相映每將鑒面兼鑒心鑒來不輟情逾深
君非結心空結帶結處尚新恩已背開簾覽鏡悲難語

對面相看孟門阻掩匣徒慙雙鳳飛懸臺欲效孤鸞舞

王安石

石百家詩選此下有按成持照尚當時只畏愁多遽變衰二句

昔日照來人共許今朝照

罷自生疑鏡上有塵猶可淬

一作拂

君恩詎肯無迴時

山行書事

日落風颭颭驅車行遠郊中心有所悲古墓穿黃茅茅

中狐兔窠四面烏鳶巢鬼火時獨出人煙不相交行行

近破村一徑歇還塲迎霜聽蟋蟀向月看蟪蛄翁喜客

來至

一作坐

客來羞厨庖濁醪誇潑

一作撥

螳時果仍新苞

相勸對寒燈呼兒藝枯梢性朴頗近古其言無斗筭憂
歡世上并歲月途中拋誰知問津客空作揚雄嘲

古宮怨

窗前好樹名玫瑰去年花落今年開無情春色尚識返
君心忽斷何時來憶昔妝成候僊仗宮璫玲瓏日新上
拊心却笑西子顰掩鼻誰憂鄭姬謗草染文章衣下履
花粘甲乙牀前帳三千玉貌休自誇十二金釵獨相向
威衰傾奪欲何如嬌愛翻悲逐佞諛重遠豈能慙沼鵠

棄前方見泣船魚看籠不記薰龍腦詠扇空曾禿鼠鬚

始喜

一作意

類蘿新託栢終傷如薺却甘荼院深

一作獨深院

開還獨閉鸚鵡驚飛苔覆地滿箱舊賜前日衣漬枕新
垂夜來淚痕多開鏡照還悲綠髻青蛾尚未衰莫道新
縑長絕比猶逢故劔會相追

關山月

淒淒還切切成客多離別何處最傷心關山見秋月關
月竟如何由來遠近過始經方覓塞終繞

一作照

白狼河

忽憶秦樓婦流光應共有已得並蛾眉還知攬纖手去
歲照同行比翼復連形今宵照獨立顧影自矍矍餘暉
漸西落夜夜看如昨借問暎旌旗何如鑒帷幕拂曉朔
風悲蓬驚雁不飛幾時征戍罷還向月中歸

隴西行

陰雲凝朔氣隴上正飛雪四月草不生北風勁如切朝
來羽書急夜救長城窟道隘行不前相呼挹鞍歇人寒
指欲墮馬凍蹄亦裂射雁旋充飢斧冰還止渴寧辭解

圍鬪但恐乘疲沒早晚邊候空歸來養羸卒一作骨

尋山家

見才調集紀事作羊士諤詩

獨訪山家歇還涉

一作步還歇

茅屋斜連隔松葉主人聞語

未開門繞籬野菜飛黃蝶

山居

看書愛幽寂結宇青冥間飛泉引風聽古桂和雲攀地
深草木稠境靜魚鳥閒陰氣晚出谷朝光先照山有時
獨杖藜入夜猶啓關星昏歸鳥過火出樵童還神體自

和適不是離人寰

楚州鹽壩古牆望海

混沌本冥冥泄為洪川流雄哉大造化萬古橫中州我
從西北來登高望蓬丘陰晴乍開合天地相沈浮長風
卷簾雲日出扶桑頭水淨露鮫室煙銷凝蜃樓時來會
雲翔道蹇即津遊明發促歸軫滄波非宿謀

聞韋駙馬使君遷拜台州

溟藩軫帝憂見說初鳴騶德勝禍先戢情閒思自流蠶

殷桑柘空廩實雀鼠稠諫虎昔賜駿安人將問牛曾陪
後乘光共逐平津遊旌旆擁追賞歌鐘催獻酬音徽一
寂寥貴賤雙沈浮北郭乏中崖東方稱上頭躋山望百
城目盡增遐愁海逼日月近天高星漢秋無階異漸鴻
有志慙馴鷗終期促孤櫂暫訪天台幽

山行經村徑

一徑有人迹到來唯數家依稀聽機杼寂歷看桑麻雨
濕渡頭草風吹墳上花却驅羸馬去數點歸林鴉

張碧

張碧字太碧貞元時人孟郊讀其集詩云天寶太白沒
六義已消歇先生今復生斯文信難缺下筆證興亡陳
辭備風骨高秋數奏琴澄潭一輪月推之者至矣詩十
六首

野田行

風昏晝色飛斜雨冤骨千堆髑髏語八紘牢落人物悲

一作是箇田園荒廢主悲嗟自古爭天下一作幾
稀盡是

度乾坤復如此秦皇矻矻築長城漢祖一作主區區白蛇

死野田之骨兮又成塵樓閣風煙兮還復新願得華山之下長歸馬野田無復堆冤者

貧女

豈是昧容華豈不知機織自是生寒門良媒不相識

幽思

金爐煙靄微銀缸殘影滅出戶獨徘徊落花滿明月

惜花三首

千枝萬枝占春開彤霞著地紅成堆一窖閒愁驅不去
殷勤對爾酌金杯

老鴉拍翼盤空疾准擬浮生如瞬息阿母蟠桃香未齊
漢皇骨葬秋山碧

朝開暮落煎人老無人為報東君道留取穠紅伴醉吟
莫教少女來吹掃

遊春引三首

勾芒愛弄春風摧開萌發翠無黨偏句芒小女精神巧

機羅杼綺滿平川

五陵年少輕薄客
蠻錦花多春袖窄
酌桂鳴金翫物華
星蹄繡轂填香陌

千條碧綠輕拖水
金毛泣怕春江死
萬彙俱含造化恩
見我春工無私理

農父

運鋤耕斲侵星起
隴畝豐盈滿家喜
到頭禾黍屬他人
不知何處拋妻子

古意

鑾輿不碾香塵滅更殘三十六宮月手持紈扇獨含情
秋風吹落橫波血

秋日登岳陽樓晴望

三秋倚練飛金盞洞庭波定平如剗天高雲卷綠羅低
一點君山礙人眼漫漫萬頃鋪琉璃煙波闊遠無鳥飛
西南東北競一作竟無際直疑侵斷青天涯屈原回日牽
愁吟龍宮感激致應沈賈生憔悴說不得茫茫煙靄堆

湖心

又云范蠡張帆一掌
風無人來往繼其中

鴻溝

毒龍銜日天地昏八紘震隼生愁雲秦園走鹿無藏處

紛紛爭處蜂成羣四溟波立鯨相

一作用

吞蕩搖五岳崩

山根魚蝦舞浪

一作渡

狂鯁鯢龍蛇膽戰登鴻門星旗羽

鏃强者尊黑風白雨東西屯山河欲拆人煙分壯士鼓

勇君王存項莊憤氣吐不得亞父斗聲天上聞玉光墮

地驚崑崙留侯氣魄吞太華舌頭一寸生陽春神農女

媧愁不言蛇枯老媪啼淚痕星曹定秤秤王孫項籍骨
輕迷精魂沛公仰面爭乾坤湏臾垓下賊星起歌聲繚
繞悽人耳吳娃捧酒橫秋波霜天月照空城壘力拔山
兮忽一作呼到此雕嘶懶渡烏江水新豐瑞色生樓臺西
楚寒蒿哭愁鬼三尺霜鳴金匣裏神光一掉一作透八千
里漢皇驟馬意氣生西南掃地迎天子

美人梳頭

玉堂花院小枝紅綠窗一片春光曉玉容驚覺濃睡醒

圓蟾挂出妝臺表金盤解下叢鬟碎三尺巫雲綰朝翠
皓指高低寸黛愁水精梳滑參差墜湏臾攏掠蟬鬢生
玉釵冷透冬冰明芙蓉拆向新開臉秋泉慢轉眸波橫
鸚鵡偷來話心曲屏風半倚遙山綠

題祖山人池上怪石

寒姿數片竒突兀曾作秋江秋水骨先生應是厭風雲
雷一作著向江邊塞龍窟我來池上傾酒尊半酣書破青
煙痕參差翠縷擺不落筆頭驚怪粘秋雲我聞吳中項

容水墨有高價

一作溶溶水
墨有高價

邀得將來倚松下鋪却雙

綰直道難掉首空歸不成畫

山居雨霽即事

一作長孫
佐輔詩

結茅蒼嶺下自與喧卑隔况值雷雨晴郊原轉岑寂出
門看反照繞屋殘溜滴古路絕人行荒陂響螻蝻籬崩
瓜豆蔓圃壞牛羊跡斷續古祠鴉高低遠村笛喜聞東
臯潤欲往未通屐杖策試危橋攀蘿瞰苔壁隣翁夜相
訪緩酌聊跂石新月出汗尊浮雲在中鳥常隳腐儒操

謬習經邦畫有待時未知非關慕沮溺


張瀛

張瀛碧之子事廣南劉氏官至曹郎詩一首

贈琴棋僧歌

我嘗聽法師一說波上蓮花水中月不垢不淨是色空
無法無空亦無滅我嘗聽師禪一觀浪溢鰲頭蟾魄滿
河沙世界盡空空一寸寒灰冷燈畔我又聽師琴一撫
長松喚住秋山雨弦中雅弄若銕金指下寒泉流太古

我又聽師棋一著山頂坐沈紅日腳阿誰稱是國手人
羅浮道士賭却鶴輸却藥法懷斟下紅霞丹束手不敢
爭頭角



御定全唐詩卷四百六十九

欽定四庫全書

集部

御定全唐詩卷四百

七十五
七十三

詳校官庶吉士

臣胡鈺

主事銜

臣徐以坤覆勘

總校官知縣

臣繆琪

校對官中書

臣高

中

謄錄監生

臣徐秉敬

欽定四庫全書

御定全唐詩卷四百七十

盧殷

宋時避諱
改作隱

盧殷范陽人為登封尉詩十三首

妾換馬

伴鳳樓中妾如龍
搥上苑同年辭舊寵
異地受新恩香閣
更衣處塵蒙噴草
痕連嘶將忍淚俱
戀主人門

七夕

河耿月涼時牽牛織女期歡娛方在此

此一作在

漏刻竟由

誰定不嫌秋駛唯當乞夜遲全勝客子嬾十載泣生離

月夜

露下涼生簟無人月滿庭難聞逆河浪徒望白榆星樹
遶孤棲鵲窗飛就暗螢移時宿蘭影思共習芳馨

仲夏寄江南

五月行將近三年客未迴夢成千里去酒醒百憂來晚
暮時看槿悲酸不食梅空將白團扇從寄復裴回

欲銷雲

欲隱從龍質，仍餘觸石文。
霏微依碧落，髣髴非雲度。
月光無隔傾河影，不分如逢作霖處。
當為起氤氲。

遇邊使

累年無的信，每夜夢邊城。
袖掩千行淚，書封一尺情。

移住別居

一作友

自到西川住，唯君別有情。
常逢對門遠，又隔一重城。

棚口逢友人

艱難別離久中外往還深已改當時法空餘舊日心

雨霽登北岸

一作原

寄友人

稻黃撲撲黍油油野樹連山澗自

一作北

流憶得年時馮

翊部謝郎相引上樓頭

長安親故

楚蘭不佩佩吳鉤帶酒城頭別舊遊
年事已多筋力在
試將弓箭到并州

悲秋

秋空雁度青天遠
疎樹蟬嘶白露寒
階下敗蘭猶有氣
手中團扇漸無端

晚蟬

深藏高柳背斜暉
能軫孤愁減昔圍
猶畏旅人頭不白
再三移樹帶聲飛

維揚郡西亭贈友人

萍颿風池香滿船
楊花漠漠暮春天
玉人此日心中事
何似乘羊入市年

獨孤申叔

獨孤申叔字子重以博學宏詞為校書郎詩一首

終南精舍月中聞磬

精廬殘夜景天宇滅埃氛幽磬此時擊餘音幾處聞隨風樹杪去支策月中分斷絕如殘漏淒清不隔雲羈人方罷夢獨鴈忽迷羣響盡河漢落千山空糾紛

嚴公弼

嚴公弼梓州人擢進士第襲父震爵封鄖國公詩一首

題漢州西湖

西湖創置自房公
心匠縱橫造化同
見說鳳池推獨步
高名何事滯川中

嚴公貺

嚴公貺公弼之弟詩一首

題漢州西湖

鳳沼才難盡餘思
鑿西湖珍木羅修岸
冰光映坐隅
琴臺今寂寞竹島尚縈紆
猶蘊濟川志芳名終不渝

莊南傑

莊南傑進士與賈島同時雜歌行一卷今存詩五首

湘弦曲

楚雲錚錚憂秋露巫雲峽雨飛朝暮古磬高敲百尺樓
孤猿夜哭千丈樹雲軒礮火聲瓏瓏連山卷盡長江空
鶯啼寂寞花枝雨鬼嘯荒郊松栢風滿堂怨咽悲相續
苦調中含古離曲繁弦響絕楚魂遙湘江水碧湘山綠

黃雀行

穿屋穿牆不知止爭樹爭巢入營死林間公子挾彈弓
一九致斃花叢裏小口黃雛未有知青天不解高高飛
虞人設網當要路白日啾嘲禍萬機

雁門太守行

旌旗閃閃搖天末長笛橫吹虜塵闊跨下嘶風白練獐
腰間切玉青蛇活擊革縱金燧牛尾犬羊兵敗如山死
九泉寂寞葬秋蟲濕雲荒草啼秋思

陽春曲

紫錦紅囊香滿風金鸞玉軾搖丁冬沙鷗白羽剪晴碧
野桃紅艷燒春空芳草絲絲延鐫平地墮蝶雙雙舞幽翠
鳳叶龍吟白日長落花聲底仙娥醉

傷歌行

兔走烏飛不相見人事依稀速如電王母天桃一度開
玉樓紅粉千回變車馳馬走咸陽道石家舊宅空荒草
秋雨無情不惜花芙蓉一一驚香倒勸君莫謾栽荊棘
秦皇虛費一作負驅山力英風一去更無言白骨沈埋暮

山碧

李溟

李溟與賈島同時詩一首

無題

喬木挂斗邑

一作色

水驛壞門開向月片帆去背雲行雁

來晚年名利跡寧免路岐哀前計不能息若為玄鬢迴

賀蘭朋吉

賀蘭朋吉與賈島同時詩一首

客舍喜友人相訪

荒居無四隣誰肯訪來頻
古樹秋中葉他鄉病裏身
鴈聲風送急螢影月流新
獨為成名晚多慙見友人

王魯復

王魯復字夢周連江人從事邕府詩四首

詣李侍郎

文字元無底功夫轉到難
苦心三百首暫請侍郎看

弔靈均

萬古汨羅深騷人道不沈明明唐日月應見楚臣心

弔韓侍郎

星落少微宮高人入古風幾年才子淚併寫五言中

故白巖禪師院

能師還世名還在空閑禪堂滿院苔花樹不隨人寂寞
數枝猶自出牆來

徐希仁

徐希仁與盧仝同時詩一首

招玉川子詠新文

清氣宿我心結為清泠音一夜吟不足君來相和吟

御定全唐詩卷四百七十

欽定四庫全書

御定全唐詩卷四百七十一

雍裕之

雍裕之貞元後詩人也詩一卷

五雜組

五雜組刺繡窠往復還織錦梭不得已成交河

剪綵花

敢競桃李色自呈刀尺功蝶猶迷剪翠人豈辨裁紅

春晦送客

一作三月晦
日郊外送客

野酌亂無巡送君兼送春明年春色至莫作未歸人

自君之出矣

自君之出矣寶鏡為誰明思君如隴水長聞嗚咽聲

四氣

春禽猶競轉夏木忽交陰稍覺秋山遠俄驚冬霰深

四色

空中冰始結盤上露初圓何意瑤池雪欲奪鶴毛鮮

道士牛已至仙家鳥亦來骨為神不朽眼向故人開
勞魴蓮渚內汗馬火旂間平生血誠盡不獨左輪殷
已見池盡墨誰言寔不黔漆身恩未報貂裘弊豈嫌

大言

四溟杯淥醕五嶽髻青螺揮汗曾成雨畫地亦成河

細言

蚊眉自可託蝸角豈勞爭欲効絲毫力誰知螻蟻誠

山中桂

八樹拂丹霄四時青不凋秋風何處起先裊最長條

蘆花

夾岸復連沙枝枝搖浪花月明渾似雪無處認漁家

江邊柳

嫋嫋古堤邊青青一樹煙若為絲不斷留取繫郎船

江上山

一本無山字

綺霞明赤岸錦纜繞丹枝楚客正愁絕西風且莫吹

游絲

游絲何所似應最似春心一向風前亂十條不可尋

柳絮

無風纔到地有風還滿空緣渠偏似雪莫近鬢毛生

殘鶯

花闌鶯亦嬾不語似含情何言百轉舌唯餘一兩聲

早蟬

一聲清潯暑幾處促流年志士心偏苦初聞獨泫然

秋蛩

雨絕蒼苔地月斜青草階
蛩鳴誰不怨況是正離懷

江上聞猿

楓岸月斜明猿啼旅夢驚
愁多腸易斷不待第三聲

折柳贈行人

那言柳亂垂盡日任風吹
欲識千條恨和烟折一枝

題蒲葵扇

傾心曾向日在手幸搖風
羨爾逢提握知名自謝公

贈苦行僧

幽深紅葉寺清淨白毫僧古殿長鳴磬低頭禮畫燈

兩頭纖纖

兩頭纖纖八字眉半白半黑燈影帷
肫肫膊膊曉禽飛
磊磊落落秋果垂

了語

掃却烟塵寇初勦深水高林放魚鳥
雞人唱絕殘漏曉
仙樂拍終天悄悄

不了語

浮名世利知多少朝市喧喧塵擾擾車馬交馳往復來
鐘鼓相催天又曉

聽彈沈湘

賈誼投文弔屈平
瑤琴能寫此時情
秋風一奏沈湘曲
流水千年作恨聲

豪家夏冰詠

金錯銀盤貯賜冰
清光如聳玉山稜
無論塵客閒停扇
直到消時不見蠅

宿棣華館聞雁

不堪旅宿棣花館
況有離羣鴻雁聲
一點秋燈殘影下
不知寒夢幾回驚

農家望晴

嘗聞秦地西風雨
為問西風早晚回
白髮老農如鶴立
麥場高處望雲開

宮人斜

幾多紅粉委黃泥
野鳥如歌又似啼
應有春魂化為燕

年來一作年年飛入未央栖

曲江池上

殷勤春在曲江頭
全藉羣仙占勝遊
何必三山待鸞鶴
年年此地是瀛洲

御定全唐詩卷四百七十一

欽定四庫全書

御定全唐詩卷四百七十二

段弘古

段弘古澧州人呂溫守道州嘗客焉後謁竇羣容州歿
旅舍詩一首

奉陪呂使君

一作郎中

樓上夜

一本下有把火二字

看花

城上芳園花滿枝城頭太守夜看時一作與報林中高
舉燭感人情思欲題詩

何元上

一作
玄之

何元上自稱我眉山人嘗居道州詩一首

所居寺院涼夜書情呈上呂和叔溫郎中

庾公念病宜清暑遣向僧家占上方月光似水衣裳濕
松氣如秋枕簟涼幸以薄才當客次無因弱羽逐鷺翔
何由一示雲霄路腸斷星星兩鬢霜

宋濟

宋濟德宗時人與楊衡符載同栖青城詩二首

塞上聞笛

一作和王七度
玉門關上吹笛

胡兒吹笛戍樓間
樓上蕭條海月閒
借問梅花何處落
風吹一夜滿關山

東鄰美人歌

花暖江城斜日陰
鶯啼繡戶曉雲深
春風不道珠簾隔
傳得歌聲與客心

符載

符載字厚之蜀人
初隱廬山後辟西川掌書記加授監

察御史集十四卷今存詩二首

題李八百洞

太極之年混沌圻此山亦是神仙宅後世何人來飛昇
紫陽真人李八百

甘州歌

月裏嫦娥不畫眉只將雲霧作羅衣不知夢逐青鸞去
猶把花枝益面歸

句

綠迸穿籬筍紅飄隔戶花

見楊慎外集

張儼

張儼貞元中人詩三首

貞元八年十二月謁先主廟絕句三首

仗順繼皇業并吞勢由已天命屈雄圖
誰歌大風起得股肱賢明能以奇用兵
何事傷客情何人歸帝京
雄名垂竹帛荒陵壓阡陌終古更何聞
悲風入松栢

先汪

先汪合江人貞元中舉孝廉詩一首

題安樂山

合江青溪上六七里隋
劉珍登真之地有祠

碧峯橫倚白雲端隋氏真人化蹟殘
翠栢不凋龍骨瘦石泉猶在鏡光寒

李赤

李赤吳郡舉子嘗自比李白故名赤詩十首

姑熟雜詠

一作李白詩

姑熟溪

愛此溪水閒乘流興無極擊楫怕鷗驚垂竿待魚食波
翻曉霞影岸疊春山色何處浣紗人紅顏未相識

丹陽湖

湖興元氣通風波浩難止天外賈客歸雲間片帆起龜
游蓮葉上鳥宿蘆花裏少女棹舟歸歌聲逐流水

謝公宅

青山日將暝寂寞謝公宅竹裏無人聲池中虛月白荒
庭衰草徧廢井蒼苔積唯有清風閒時時起泉石

凌敲臺

曠望登古臺臺高極人目疊嶂列遠空閒花雜平陸白
雲入窓牖野翠生松竹欲覽碑上文苔侵豈堪讀

桓公井

桓公名已古廢井曾未竭石甃冷蒼苔寒泉湛孤月秋
來桐暫落春至桃還發路遠人罕窺誰能見清澈

慈姥竹

野竹攢石生含烟映江島翠色落波深虛聲帶寒早龍

吟曾未聽鳳曲吹應好不學蒲柳凋貞心常自保

望夫山

顥望臨碧空怨情感離別芳草不知愁巖花但爭發雲
山萬重隔音信千里絕春去秋復來相思幾時歇

牛渚磯

絕壁臨巨川連峰勢相向亂石流湍間迴波自成浪但
驚羣木秀莫測精靈狀更聽猿夜啼憂心醉江上

靈墟山

丁令辭世人拂衣向仙路伏鍊九丹成方隨五雲去松蘿蔽幽洞桃杏深隱處不知曾化鶴遼海歸幾度

天門山

迴出江水上雙峰自相對岸映松色寒石分浪花碎參差遠天際縹緲晴霞外落日丹去遙回首沈青靄

薛昇

薛昇河東人德宗朝詩人也詩一首

勅贈康尚書

知美人

天門喜氣曉氛氲聖主臨軒召冠軍欲令從此行霖雨
先賜巫山一片雲

孫叔向

孫叔向德宗時人詩三首

將赴東都上李相國

四海兵初偃平津閣正開誰知大爐火還有不然灰

題昭應溫泉

一道溫泉繞御樓先皇曾向此中游雖然水是無情物

也到宮前咽不流

送咸安公主

鹵簿遲遲出國門
漢家公主嫁烏孫
玉顏便向穹廬去
衛霍空承明主恩

劉皂

劉皂貞元間人詩五首

邊城柳

一株新柳色十里
斷孤城為近東西
路長懸離別情

長門怨三首

雨

一作淚

滴長門秋夜長愁心和雨到昭陽淚痕不學

一作共

君恩斷拭却千行更萬行

宮殿沉沉月欲

一作色

分昭陽更漏不堪聞珊瑚枕上千

行淚不是思君是恨君

蟬鬢慵梳倚帳門蛾眉不掃慣承恩旁人未必知心事

一面殘妝空淚痕

旅次朔方

一作賈島詩

客舍并州數十霜歸心日夜憶咸陽無端又渡桑乾水
却望并州似故鄉

楊厚

楊厚貞元間詩人詩一首

早起

星漢轉寒更伊余索寞情鐘催歸夢斷雁引遠愁生危
壁蘭光暗疎簾露氣清閒庭聊一望海日未分明

裴交泰

裴交泰貞元間詩人詩一首

長門怨

自閉長門經幾秋
羅衣濕盡淚還流
一種蛾眉明月夜

南宮歌管

一作吹

北宮愁

李秘

李秘唐宗室也貞元元和間人詩一首

禁中送任山人

此人自青城獻伏火諸石
恩命令於本山更取大還

子去非長往君恩取大還
補天留彩石縮地入青山
獻

壽千春

一作秋

外來朝數月間莫拋殘藥物竊取

一作切欲

駐

童顏

殷堯

一作克

恭

殷堯恭元和間人詩一首

府試中元觀道流步虛

一作殷堯藩詩

玄都開秘籙白石禮先生上界秋光靜中元夜景清星
辰朝帝處鸞鶴步虛聲玉洞花長發珠宮月最明掃壇
天地肅投簡鬼神驚儻賜刀圭藥還成不死名

林傑

林傑字智周閩人幼而秀異六歲賦詩援筆立成唐扶
見而賞之又精琴棋草隸舉神童年十七卒詩二首

王仙壇

羽客已登仙路去丹鑪草木盡凋殘不知千載歸何日
空使時人掃舊壇

乞巧

七夕今宵看碧霄牽牛織女渡河橋家家乞巧望秋月

穿盡紅絲幾萬條

句

金盤摘下挂朱顥紅殼開時飲玉漿

咏荔枝
見紀事

鄭立之

鄭立之貞元元和中人詩一首

哭林傑

才高未及賈生年何事孤魂逐逝川
螢聚帳中人已去

鶴離臺上月空圓

蘓郁

蘇郁貞元元和間詩人詩三首

詠和親

一作和戎

關月夜懸青冢鏡寒雲秋薄漢宮羅君王莫信和親策

生得胡離虜

一作轉

更多

鸚鵡詞

莫把金籠閉鸚鵡箇箇分明解人語忽然更向君前言

三十六宮愁幾許

步虛詞

十二樓藏玉堞中鳳凰雙宿碧芙蓉

一作梧桐

流霞淺酌誰

同

一作留君

醉今夜笙歌

一作吹簫

第幾重

句

吟倚雨殘樹月收山下村

見張為主客圖

浩虛舟

浩虛舟隰州刺史聿之子中宏詞科詩一首

賦得琢玉成器

已沐識堅貞應憐器未成輝山方可重散璞乍堪驚玷
滅随心正瑕消奪眼明琢磨虹氣在拂拭水容生賞翫
冰光冷提攜月魄輕佇當親捧握瑚璉幸齊名

蔡京

蔡京初為僧令狐楚鎮滑臺勸之學後以進士舉上第
官御史謫澧州刺史遷撫州詩三首

責商山四皓

秦末家家思逐鹿商山四皓獨忘機如何鬢髮霜相似

更出深山定是非

假節邕交道由吳溪

停橈橫水中舉目孤烟外借問吳溪人誰家有山賣

詠子規

千年冤魄化為禽永逐悲風叫遠林
愁血滴花春艷死月明飄浪冷光沈
凝成紫塞風前淚驚破紅樓夢裏心
腸斷楚詞歸不得劍門迢遞蜀江深

張頂

張頂撫州人詩一首

獻蔡京

蔡京刺撫州州有放生池京禁魚罟
頂乘小舟垂釣京捕之因獻此詩

拋却長竿卷却絲手持蓑笠獻新詩
臨川太守清如鏡
不是漁人下釣時

欽定四庫全書

御定全唐詩
卷四百七十二

御定全唐詩卷四百七十二

欽定四庫全書

御定全唐詩卷四百七十三

李逢吉

李逢吉字虛舟隴西人登進士第元和長慶兩朝嘗再
為宰相太和中以司徒致仕卒諡曰成其詩與令狐楚
同編者名斷金集今存八首

享惠昭太子廟樂章

既潔酒醴聿陳熟腥肅將震念昭格儲靈展矣禮典薰

然德馨悃悃管磬亦具是聽

望京樓

一作臺

上寄令狐華州

祇役滯南服
顧思屬暮年
閒上望京臺
萬山蔽其前
落日歸飛翼
連翩東北天
涪江適在下
為我久潺湲
中葉成文教
德威清遠邊
頒條信徒爾
華髮生蒼然
寄懷三峰守
岐路隔雲煙

再赴襄陽辱宣武相公貽詩今用奉酬

解鞍辭丹禁
揚旌去赤墀
自驚非素望
何力及清時
又

據三公席多慙四老祠峴山風已遠棠樹事難追江漢
饒春色荆蠻足夢思唯憐吐鳳句相示鑿龍期

奉送李相公重鎮襄陽

海內埏埴徧漢陰旌旆還望留丹闕下恩在紫霄間冰
雪背秦嶺風煙經武關樹皆人尚愛轅即吏曾攀自惜
兩心合相看雙鬢斑終期謝戎務同隱鑿龍山

和嚴揆省中宿齋遇令狐員外當直之作

致齋分直宿南宮越石盧謚此夜同位極班行猶念舊

名題章奏亦從公曾驅介士三邊靜新贈髯參六義窮
竟夕文昌知有月可憐如在庾樓中

奉酬忠武李相公見寄

直繼先朝衛與英能移孝友作忠貞劒門失險曾縛

一作

搏

虎淮水安流緣斬鯨黃閣碧幢惟是儉三公二伯未
為榮惠連忽贈池塘句又遣羸師破膽驚

酬致政楊祭酒見寄

初還相印罷戎旃獲守皇居在紫煙安比鄴侯功茂爾

每懷疏傳意

一作思

悠然應將半俸霑閭里料入中條訪

洞天十載別離那可道倍令驚喜見來篇

送令狐秀才赴舉

子有雄文藻思繁
齡年射策向金門
前隨鸞鶴登霄漢
却望風沙走塞垣
獨憶忘機陪出處
自憐何力繼飛翻
那堪兩地生離緒
蓬戶長扃行旅喧

于頔

于頔字允元河南人以蔭補千牛擢累駕部郎中湖蘇

二州刺史襄州節度觀察使元和初拜司空尋貶恩王
傅終太子賓客詩二首

郡齋卧疾贈畫上人

風陪翰墨徒深論窮文格麗則風騷後公然我詞客晚
依方外友極理探精賸胷合南北宗畫公我禪伯尤明
性不染故我行貞白隨順令得解故我言芳澤雪水漾
清潄吳山橫碧岑含珠復蘊玉價重雙南金的皦曜奇
彩淒清流雅音商聲發楚調調切譜瑤琴吳山為我高

雪水為我深萬景徒有象孤雲本無心衆木豈無聲椅
桐有清響衆耳豈不聆鍾期有真賞高潔古人操素懷
夙所仰覲君冰雪姿祛我滯滯想常吟柳惲詩苔浦久
相思逮此遠為郡蘋洲芳草衰逢師年臘長值我病容
羸共話無生理聊用契心期

和丘員外題湛長史舊居

蕭條歷山水木無氛滓王門結長裾巖扃怡暮齒昔
賢枕高躅今彥仰知止依依矚煙霞眷眷返壩里湛生

久已沒丘也亦同耻立言咸不朽何必在青史

盧景亮

盧景亮字長晦范陽人少孤力學善屬文德宗時歷右
補闕鯁毅無所回貶斥二十年至元和初召還再遷中
書舍人詩一首

寒夜聞霜鐘

洪鐘發長夜清響出層岑暗入繁霜切遙傳古寺深何
城亂遠漏幾處雜疎砧已警離人夢仍霑旅客襟待時

當命侶抱器本無心儻若無知者誰能設此音

李渤

李渤字濬之洛陽人少隱嵩山元和中徵為著作郎敬
宗時由考功郎中拜給事中伉直敢言出為桂管觀察
使詩五首

南溪詩

并序

桂水灘山右匯陽江數里餘得南溪口溪左屏外
崖巘闢麗爭高其孕翠曳煙灑迤如畫左連幽墅

園田雞犬疑非人間汭流數百步至巖巖下有灣
壤沮洳因導為新泉山有二洞九室西南曰白龍
洞橫透巽維蛻骨如玉西北曰玄巖洞曲通坎隅
睛眺灘水玄巖之上曰丹室白龍之右曰夕室巽
維北梯險至仙窟北又有石室參差呀豁延景宿
雲其洞室並乳溜凝化詭勢奇狀俯而察之如傘
如傘如欒樞支撐如蓮蔓藻井左睨右瞰似簾似
幃似松偃竹裊似海蕩雲驚其玉池井嵐颺迴還

交錯迷不可紀從夕室梁溪向郭四里而近去松
衢二百步而遙余獲之若獲荆璆與地珠焉亦疑
夫大舜遊此而忘歸矣遂命發潛敞深磴危宅既
翼之以亭榭又韻之以松竹似譙方丈似昇瑤臺
麗如也暢如也以溪在郡之南因目為南溪兼賦
詩以紀之寶歷三年三月七日

玄巖麗南溪新泉發幽色巖泉孕靈秀雲煙紛崖壁斜
峰信天插竒洞固神闢窈窕去未窮環迴勢難極玉池

似無水玄井昏不測仙戶掩復開乳膏凝更滴丹砂有
遺址石徑無留跡南眺蒼梧雲北望洞庭客蕭條風煙
外爽朗形神寂若值浮丘翁從此謝塵役

喜弟淑再至為長歌

第六句
缺四字

前年別時秋九月白露吹霜金吹烈離鴻一別影初分
淚袖雙揮心哽咽別來幾度得音書南岳知

廬山峨峨倚天碧捧排空崖千萬尺社牂長題高士名
食堂每記雲山跡我本開雲此山住偶為名利相縈誤

自負心機四十年差聞社客山中篇憂時魂夢憶歸路
覺來疑在林中眠昨日亭前烏鵲喜果得今朝爾來此
吾吟行路五十篇盡說江南數千里自憐兄弟今五人
共縈儒素家尚貧雖然廩餼各不一就中總免拘常倫
長兄年少曾落拓拔劍沙場隨衛霍口裏雖譚周孔文
懷中不舍孫吳略次兄一生能苦節夏聚流螢冬映雪
非論疾惡志如霜更覺臨泉心似鐵第三之兄更奇異
昂昂獨負青雲志下看金玉不如泥肯道王侯身可貴

却愁清逸不干時高蹤大器無人知倘逢感激許然諾
必能萬古留清規念爾年來方二十風夜孜孜能獨立
卷中筆落星漢搖洞裏丹靈鬼神泣嗟余流浪心最狂
十年學劍逢時康心中不解事拘束世間談笑多相妨
廣海青山殊未足逢著高樓還醉宿朝走安公櫓上駒
暮倫陶令籬邊菊近來詩思殊無況苦被時流不相放
雲騰浪走勢未衰鶴膝蜂腰豈能障送爾為文殊不識
貴從一一傳胷臆若到湖南見紫霄會須待我同攀陟

留別南溪二首

常歎春泉去不回我今此去更難來
欲知別後留情處手種巖花次第開

如雲不厭蒼梧遠似鴈逢春又北歸
惟有隱山溪上月年年相望兩依依

桂林歎鴈

三朝四黜倦遐征往復皆愁萬里程
爾解分飛却回去我方從此向南行

孟簡

孟簡字幾道德州人舉進士宏詞皆及第元和中累官
至戶部侍郎坐事貶吉州司馬詩七首

享惠昭太子廟樂章

喧喧金石容既缺肅肅羽駕就行列緱山遺響昔所聞
廟庭進旅今攸設

擬古

劍客不誇貌主人知此心但營纖毫義肯計千萬金勇

發看驚擊憤來聽虎吟平生貴酬德刃敵無幽深

詠歐陽行周事

并序

閩越之英惟歐陽生以能文擢第爰始一命食太
學之祿助成均之教有庸績矣我唐貞元年己卯
歲曾獻書相府論大事風韻清雅詞旨切直會東
方軍興府縣未暇慰薦久之倦游太原還來帝京
卒官靈臺悲夫生於單貧以狗名故心專勤儉不
識聲色及茲筮仕未知洞房纖腰之為蠱惑初抵

太原居大將軍宴席上有妓北方之尤者屢目於
生生感悅之留賞累月以為燕婉之樂盡在是矣
既而南轅妓請同行生曰十目所視不可不畏辭
焉請待至都而來迎許之乃去生竟以蹇連不克
如約過期命甲遣乘密往迎妓妓因積望成疾不
可為也先死之夕剪其雲髻謂侍兒曰所歡應訪
我當以髻為貺甲至得之以乘空歸授髻於生生
為之慟怨涉旬而生亦歿則韓退之作何蕃書所

謂歐陽詹生者也河南穆玄道訪予常歎息其事
嗚呼鍾愛於男女素期效死夫亦不蔽也大凡以
斷割不為麗色所汨豈若是乎古樂府詩有華山
畿玉臺新詠有廬江小吏相死或類於此暇日偶
作詩以繼之云

有客西北逐驅馬次太原太原有佳人神豔照行雲座
上轉橫波流光注夫君夫君意蕩漾即日相交歡定情
非一詞結念誓青山生死不變易中誠無間言此為太

學徒彼屬北府官中夜欲相從嚴城限軍門白日欲同
居君畏仁人聞忽如隴頭水坐作東西分驚離腸千結
滴淚眼雙昏本達京師迴賀期相追攀宿約始乖阻彼
憂已纏綿高髻若黃鸝危鬢如玉蟬纖手自整理剪刀
斷其根柔情託侍兒為我遺所歡所歡使者來侍兒因
復前投淚取遺寄深誠祈為傳封來贈君子願言慰窮
泉使者迴復命遲遲蓄悲酸庖生喜言旋倒屣走迎門
長跪聽未畢驚傷涕漣漣不飲亦不食衷心百千端襟

情一夕空精爽旦日殘哀哉浩然氣潰散歸化元短生
雖別離長夜無阻難雙魂終會合兩劍遂蜿蜒丈夫早
通脫巧笑安能干防身本苦節一去何由還後生莫沈
迷沈迷喪其真

惜分陰

業廣因功苦拳拳志士心九流難酌挹四海易消沈對
景嗟移晷窺園詎改陰三冬勞聚學駟景重兼金刺股
情方勵偷光思益深再中如可冀終嗣絕編音

嘉禾合穎

玉燭將成歲封人亦自歌八方霑聖澤異畝發嘉禾共
秀芳何遠連莖瑞且多穎低甘露滴影亂惠風過表稔
由神化為祥識氣和因知興嗣歲王道舊無頗

賦得亞父碎玉斗

獻謀既我違積憤從心悔鴻門入已迫赤帝時潛退寶
位方苦競玉斗何情愛猶看虹氣凝詎惜冰姿碎而嗟
大事返當起千里悔誰為西楚王坐見東城潰

酬施先輩

襄陽才子得聲多四海皆傳古鏡歌
樂府正聲三百首梨園新入教青娥

王仲舒

王仲舒字弘中并州祁人少客江南與梁肅楊憑游並
有文名元和初為職方郎中知制誥穆宗初為中書舍
人終江南西道觀察使詩一首

寄李十員外

百丈懸泉舊卧龍欲將肝膽佐時雍
惟愁又入煙霞去
知在廬峰第幾重

孫草

一作華

孫草憲宗朝為監察御史詩一首

訪羊尊師

一作賈島詩

松下問童子言師採藥去只在此山中雲深不知處

汪萬於

汪萬於字叔振歙人憲宗時為江陵戶曹參軍詩一首

晚眺

杖策倚柴門，泉聲隔岸聞。
夕陽諸嶺出，晴雪萬山分。
靜對豺狼窟，幽觀鹿豕羣。
今宵寒月近，東北埽浮雲。

何儒亮

何儒亮與孟簡同時人詩一首

亞父碎玉斗

羸女昔解網，楚王有遺躅。
破關既定秦，碎首聞獻玉。
貞姿應刃散，清響因風續。
匪狗切泥功，將明懷璧辱。
莫量

漢祖德空受項君勛事去見前心千秋渭水綠

李宗閔

李宗閔字損之擢進士補洛陽尉累官駕部郎中知制誥穆宗即位拜中書舍人寶歷初進兵部侍郎太和中同中書門下平章事遷中書侍郎出為山南西道節度使尋復秉政後貶死詩一首

贈毛仙翁

不知仙客占青春肌骨纔教稱兩旬俗眼暫驚相見日

疑心未測幾時人間推甲子經何代笑說浮生老此身
殘藥僅能沾朽質願將霄漢永為鄰

韋表微

韋表微字子明擢進士第數辟諸使府入授監察御史
裏行俄為翰林學士知制誥久之遷中書舍人文宗立
進戶部侍郎卒贈禮部尚書詩一首

池州夫子廟麟臺

二儀既閉三象乃乖聖道埋鬱人心不開上無文武下

有定哀吁嗟麟兮孰為來哉周雖不綱孔實嗣聖詩書
既刪禮樂大定勸善懲惡姦邪乃正吁嗟麟兮克昭符
命聖與時合化行位尊苟或乖戾身窮道存於昭魯邑
樓遲孔門吁嗟麟兮孰知其仁運極數殘德至時否楚
國寢廣秦封益侈牆仞迫阡崎嶇闕里吁嗟麟兮靡有
攸止世治則麟世亂則麋出非其時麋鹿同羣孔不自
聖麟不自祥吁嗟麟兮天何所亡

御定全唐詩卷四百七十三